

por escrito. Nos por conclui esey en bista di e stipulacion relaciona cu publicacion di e conseho.

Gobierno no tin obligacion di sigui e conseho di Raad van Advies, pero ora Gobierno no ta comparti e opinion di Raad e mester motiva su desacuerdo. Tampoco Gobierno por laga e conseho di Raad un banda, esta no tuma conocimiento di of no warda ariba e conseho. Esey lo ta contra e obligacion constitucional di Gobierno pa scucha Raad van Advies. Di otro banda, ora Gobierno y Staten keda sin scucha Raad van Advies, segun 'jurisprudencia', den cuadro di adopta un proyecto di ley, tal ley tin forza di ley. Esey no ta conta si pa decretonan nacional cu forza di ley. Den pasado e validez di tal decreto a keda rechasa pa huez. Sin embargo, den preparacion y realisacion di un proyecto di ley e organonan administrativo y politico mester vigila minuciosamente cu ta observa e reglanan material y procedural di e Constitucion Arubiano.

En bista cu e tarea di Raad van Advies ta extendi su mes riba henter e tereno di legislacion y administracion, e ta distingui su mes di otro colegionan consultivo cu ta contribui cu nan experticio ariba terenonan specialisa. Raad ta e consehero superior y den ultimo instancia di Gobierno. Hunto cu su papel, ancla constitucionalmente, e conclusion mester ta cu Raad van Advies ta un actor den e proceso legislativo. 

**J. Ronald T'chong a gradua den derecho fiscal na universidad di Tilburg. Ela traha na inspectie di belasting desde 1982 como inspector adhunto, di 1984 te 1986 como inspector general. Na 1986 el a bira e prome director di e direccion di impuesto y aduana di Aruba. Na 2003 el a baha cu pensioen. Desde augustus 2004 e ta miembro di Raad van Advies. Prome cu el a drenta den servicio di gobierno e tabata traha den sector priva.*

